

四庫全書

集部

欽定四庫全書

集部

甬上耆舊詩卷九至十一

詳校官右中允_臣薩敏

主事銜_臣徐以坤覆勘

總校官庶吉士_臣朱銓

校對官編修_臣盧遂

謄錄監生_臣范鳴謙

欽定四庫全書

。甬上耆舊詩卷九

監察御史胡文學編

布政陸石溪先生銓

先生字選之按察副使。偁之第二子也。美風儀。質性英銳。過人。讀經史百家言。一覽輒解。解輒能不。忘操筆為文。即奇氣橫發。率出自胸中所造。直追古人時論。目為柳州蘇文忠一流。以進士為刑。

部主事值大禮議起先生哭諫廷杖幾絕而蘇尋
以才推典十三司章疏數斷大獄若繩藩藩不法
處分哈密情罪舉朝不能決先生直以片詞折之
改武庫員外郎是歲朝廷初命內臣司外文柄先
生出主福建考稱得人轉禮部儀制郎中上方稽
古禮文更新制作創四郊親籍親蠶諸議內降旁
午先生討論陳奏須臾凡數四宗伯大臣盡倚以
為辨上特頒白金采幣旌其才竟以永嘉所忌出

為福建按察副使攝海道漳故利窟先生嚴立法
禁諸射利奸人無不斂跡遷河南叅政值歲旱蝗
民多流徙先生勞心招恤所復業數百萬人尋遷
廣西按察使時弩灘猺賊侯公丁雜處胡藍二姓
間共為寇當事議大舉兵殲之先生曰是堅賊黨
而分我兵力也且順逆難盡明不若討渠首而釋
其餘弩灘果定尚書毛公秉鉞至安南知先生才
密與謀先生為畫征撫之策安南遂平隨遷廣東

布政使以內艱歸卒於家先生少負才雄視當世
豪傑每誦陳同甫人中之龍文中之虎意以自許
居官判禁解劇應之常有餘時方以豐功巨績期
之竟齎志而歿識者憾焉所著詩文集藏於家

余嘗手錄先生詩七十一首序之曰書曰詩曰志
謂詩在能宣其志所欲言也由是諧之成聲束之
中律此論詩之本也三百篇言孝子之志莫如蓼
莪七章言忠臣之志莫如北山六章彼亦盡其志

所欲言而止初不知有自我先有自我後也以至
司馬長卿所夜誦蘇屬國所贈枚生所唱歎銅雀
三祖所歌尚仍各言其志也自鍾嶸作詩品于一
人下必系曰其源出於某家形似彷彿可發一笑
後人祖其說遂謂確有所本然初未嘗顯然剽竊
也至西涯之後北地勃興一時詞人盡宗之轉相
擬議刻畫字句以能作楚相衣冠抵掌足欺新豐
犬鴨便謂得附正宗于是天下之詩俱言人所言

不復自言其志矣吾鄉諸先生恥之自白齋文懿
文定十餘家並能卓犖自持不同于流俗而吾石
溪陸先生更以奇氣激亢橫絕其間先生少負異
才意歷落自許睨視一世慕古人仗節死義事所
過奇山水必登望既以廷諍大禮受杖每言及永
嘉長鬣豎儒輒欲橫唾其面試讀其挽羅峯與李
中溪叙別諸詩執義忼慨聲詈並發浩然沛然直
寫其志所欲言而莫能禦正使懦夫讀之亦有起

色蓋先生論詩專以性情為主嘗曰宋不能唐唐不能漢魏其似者宋之唐唐之漢魏耳斯其持論獨立若此以俯視世人閉氣噎聲句譟字割畢身作詩未得吐心吐意自作一語真蹢躅可憐蟲也仲長統曰百家雜碎請用從大唐荆川先生曰若付祖龍當使南山竹木減價差快人意矣先生詩惟家乘寫本一卷故詞家無知先生者其後人陸鈐侯出此卷相示余謂家藏神劍長閉室中使龍

身虎氣不得騰出人間亦奚貴世有風胡子邪因
為手錄其詩一卷序而傳之萬生允誠曰先生方
選白齋二集今復錄石溪詩其伯仲若何余曰白
齋高士石溪奇男子風格微不同但白齋力去陳
言確以作者自命石溪則無意求工而蕪言宿氣
亦能擺落要諸兩先生真詩家之烏獲也

晉史載龍山之會風吹孟嘉落帽桓溫使孫盛
為文嘲之嘉作解嘲詞致超逸四座驚歎蘇

子瞻惜其文不傳為四言補亡余讀之竊謂
嘲者以禮解者以道庶乎兩得蘓詞且非晉
語也更為補二首

聚瞻飭儀式崇侈度履薄臨深細矜返顧龍山嘉集羣
賢昭姱金石在堂儼相在昨胡愆于儀巾脫頂露僕隸
舍嗤將軍薄怒壁輕于瑕楠斥于蠹桑簡避時禰狂矯
故彼非昌期乖此繩步耳目外慚周章內寤請歌相鼠

以終韶獲

右孫盛
獻嘲

至敬弗儀大道易飭在朝維臣在野維客臣道足恭客
情樂託岸帽為賢爭席為適明明我侯厭彼局束駕言
出郊以坦心腹勿弛于儀曷彰休德郭巾偶折慕之成
俗事異並傳孟可比郭亦有畏威免冠昭責免既為恭
落亦何失哂此細人從羈受勒

右孟嘉
解嘲

述懷

遇事不適意蕭然思故廬故廬久荒寂人生安所居坐
卧得率意側步心常舒寧如日東帶三騶為前驅徒爾

眩人目宛然受羈拘寄聲示僮僕洒掃吾庭除

偶感

無事久宴坐悠然生遐思白日不可留營營將何之開
卷理達言默對相嗟咨往日已莫及來塗尚可資有誰
若相囊何為自次且飲酒不能樂入山無舒期人生棄
所適以戚為怡怡

乾明寺與蘇齋同遊

七聖遊茲山忽迷不知路相傳幾歲年茲山尚如故在

聖迷亦奇古今問遺步我來得與君萍逢偶相聚華尊
傾山房疇昔紓衷素百意難盡宣欲言色相顧對此古
奇踪悵然發遙慕朗晰豈不賢皦皦世所惡大道尚渾
淪退藏戒輕露乃知匪所迷冥理此中寓莞然向古人
千載藉微晤

撥悶

修途繁春雨新水馳驚湍灘聲起林杪浦色迷遠天溯
游違水性力挽苦不前歸情逐飛鳥度日長如年靜坐

快鬱思起立當帷
寒前村靄雲樹汀
曲只尺間候久望
益渺日暮生夕烟
來船翼雙櫓中流
歌鼓填一息去千
里疾若矢發弦勞
逸迴倍屣遲速殊
相懸事以乘機易
力因失勢難引觸
思至理何獨舟行
然因之停遐矚返
卧舒中煎

舍陸登舟情意甚適

馳輿罕靜思理棹
沿清流眇聲聆石
瀨野色睨春柔鷗
浴潔皓羽燕語紛
元游身逸佳景集
道悟羣鷺收昨非

悔囂境今是怙滄洲嗟予本越產水國無塵憂汲湖代
鑿井命駕惟攜舟植涯列繁翠開閣延清飈卯角狎幼
性束帶滋離愁豪心恥牛馬微息悲蜉蝣行行愜淵尚
適意將焉求

下灘

遠望灘將至俄驚水漸鳴船奔如逸馬楫擊起游鯨暗
石寒傍閃前山眩遠迎濺濤常至頰逐鳥自怡情去急
風加勁翻陰日半明傍觀俱失色獨坐只聞聲勢自難

中息舟誰可並行眼輕千里近心渺五湖平定力惟孤
舵旁扶藉衆撐樂從險處得驚向順中生灘盡重回首
長嗟事倖成

到萬安

盡日鬪風行計程百餘里水下舟自速浪峻不能弭戒
險屢停橈循岸聊倚徙日斜氣欲曛來船勢未已歸心
易動搖野泊慮不避奮橈復同行汀曲何迤邐須臾天
際昏遠燈照村溪遙望不得前寒夜風益駛咫尺宵莫

辨暗石利如齒灘浮雨覆舟檣折帆已毀心惻不能援
冒險鑒前趾那見萬安城彷彿聞人語喧呼兩相應擲
纜遙得艤泊岸一長吁履危不知止

度嶺後漸寒

初春戒羊城氣暖親締葛度嶺春已杪怯風襲冬旣相
去千里間寒燠判如劃物性亦從人宜土乃易茁橘柚
常去燕梨棗不居粵植根一失所生意已先闕奚為冠
裳驅風土奪所悅六氣為人讎變息苦伺隙行行歸吾

鄉安栖養歲月

少年行

金鞍白馬長安道日日醉眼嗔春風胡姬滿前不稱意
梟盧一擲千金空赤手入市索美酒抵掌拔劍矜豪雄
傾盆倒甕不論價一醉上馬飛雲龍借問少年住何處
錦衣出入長楸宮

月湖行

我家住在湖之西中有島嶼湖之湄東風三月桃花水

清陰百丈楊柳堤寶塔浮雲聳高漢石橋流水飛雙鳬
高漢雙鳬西復東往來人影綠光中狂客祠前朝酹酒
夢公堂裏夜聞鐘風起沙驚鳬鴻亂雨來聲滿荻蒲叢
何家公子好遊俠木蘭為船桂為楫輕篷細槳蕩中流
翠鈿寶髻嬌雙頰清歌一曲白雲飛朱顏百媚紅蕖落
湖前湖後何繽紛橋上人看湖上人行入但識湖船樂
遊人更羨湖光新夾岸人家門第改惟餘明月湖心在
露華曉候漁舟出星光暮入水亭待亭上主人久不歸

湖光月影徒輝輝

湘湖在蕭山縣北二里山絕頂有荒城杞櫓滿
道故壘隱隱山脚名排馬人言吳勝越拘句
踐于此是日與陳見吾同遊

陳侯慷慨還風流攜我湘湖登綵舟湘湖去縣十二里
琉璃萬頃蒼波浮來商去賈不復識清風白日閒飛鷗
主人桂楫相為開萍牽芰蒨何徘徊須臾山曠湖風發
船頭噴浪聲如雷酒酣日落鳬鷺亂振衣倚棹登荒臺

荒臺絕頂臨平野血崖骨壘森杞櫟人言夫差敗越王
孤軍因此如飄瓦吳軍滿地喧貔貅至今山脚名排馬
聞言慘淡不欲留天風颯颯吹梧楸古來英雄競閒氣
片言不合成深讐轉盼千年僅昨日敗軍勝將同荒丘
陳侯陳侯歸去來登舟長嘯且銜杯古人弔古還成古
今人不衰後復衰眼前功名亦吳越吳越于我何有哉
陳侯陳侯歸去來

游紫雲洞歌

石竺山高高入雲芙蓉削立迷荆榛折茅鑿石誰為此
相傳九鯉藏其真奇岩爭出似相搏凭虛萬丈縣高閣
倒垂突出如蜂房上牽石背下垂壑我行喘喲不可登
十步五坐驚崢嶸攀藤斷身欲仆步苔苔滑足欲傾
逡巡險度觀音巖巖欹只尺心膽寒宛轉忽入紫雲洞
洞古陰黑生烟嵐小樓斜轉深洞旁青天壁翠開明窻
諸峯萬狀拱且伏溪流北遶還西橫凭欄下瞰來時路
蛇行鵬翦忘其故但聞松聲謾謾響下方鳥飛貼地隨

雲霧老僧住山數十年自稱絕與人世無牽緣山收谷
採足自給童子不知有肥鮮樵夫肩疲亦不至豈有冠
蓋來山巔我聞大笑命之坐古來奇跡俱告我壁縣怪
石色如鐵擊之金石聲欲裂轉背北上有石塔石梁三
寸去路狹老僧往來健若飛凌虛直度神不懼更有丹
竈不可尋山變密護何深深徃徃丹砂雨漂出仙人宵
渺傳清音嗟我興狂欲長徃新著芒屨桃竹杖太陽垂
脚不可留長嘯歸來色懽恍

嘉靖丙申閏十二月同蘇齋游南召子陵洞蘇
齋畏險不敢上余乘興獨往入洞眺視踰時

而還

南召山有子陵洞巉巖縣結山之顛怪巖倒石如熊虎
左跑右踞森相攢中有一徑導飛鳥紆迴側上還傍牽
登者膽墮中道阻洞中之景空相傳我性好山不畏險
仰頭視洞遙垂涎束衣換履奮獨上喘汗聳膝定復前
盤迴近洞幾二里突崖倒出鳴飛泉兩脚苔滑不得力

下臨無際旁無邊攀藤倚崖側身度斯須洞出開青蓮
洞中石髓成萬象宛如人立如鳥翩更有融結同床几
高可箕坐平可眠然炬直入深無底旁環古井流潺湲
下視民廬沒蓬莽千村百雉同杯棬我思子陵古狂客
笑睨萬乘如浮烟解衣深卧須此洞高風千仞猶泠然
我思久留苦不得翩陞雙鳥臂脫猿蘓君愛山尤自愛
笑我蹈險情何偏蘓君蘓君吾語汝世間設險俱如天
長安更有仕宦穿薦紳失脚多傾顛擠排且欲下以石

絲牽髮引相黃綠君知其險有如此何不驚此驚山川

悲金斗

金斗山出銀礦馬山青山勝朶五朶俱山名

噫嘻金斗何巔岼根脈直與終南太白相牽聯蜿蜒近
若蚪形走騰踊迴如鵬翅騫馬山萬疊塞門戶青山千
仞齊胷肩勝朶挿天翼其右五朶蔽日屏其前白晝虎
出怒當路晴空霧起昏濛巔土民頭白未敢上樵夫斧
爛何曾攀何人浪識金銀氣一朝奉命開蒼烟斫崖鑿
石萬聲吼裹糧篝火千人懸使者催書日絡繹空山呵

衛聲喧閭斯須鑿空如覆屋紆迴水滲成流泉轆轤旋
轉斷筋力陰寒慘慄侵肌骭將崩恐崩石難測枯骸簇
簇真可憐壯丁採辦窮日夜烈火燒煉唯流鉛得無鬼
神忌多取天藏地書理固然我願廟堂尚樸儉太平所
守在四邊鞭笞角腦歸南畝盜礦賊號角腦驅收哪噠耕春田
通番賊號哪噠山珍水寶坐待出斗米不須二十錢自然之利
亦無害何為舍易圖其難嗚呼堂堂大臣正當軸草茅
閉口受役夫何言

民謠

毀我十家廬構爾一郵亭奪我十家產築爾一佳城官
長尚為役我曲何時直湖有數山有谷本是太平民豈
願作逋客男兒無罪被人縛走向深山方敢哭

誰謂邑有賢貴將奪我田誰謂邑有賊功成授我秩移
家莫近大宅居但願土風淳且熙貧賤相憐貴不欺

病中漫述

叢竹映高堂經旬卧竹牀色驚談虎變身怖觸龍傷弱

質秋先覺愁懷夜獨長病源人不識名利在膏肓
一室靜無塵徐回造化春罇風讐病骨簾日伴愁人藥
換醫心惑呼頻僕背嗔小愉聊自慰他日更沾巾
不死君王賜時和天地恩憲明舒宿寤軒近息驚魂拳
足寒塘鷺低頭暮雨鴛完軀歸故土追悔可重論

十一日出灣時張少傳同行

豈不戀明主那能黨貴臣一官瀕海國萬里寄閒身旅
思隨飛鳥漁歌起白蘋傳聞張少傳同日問江津

文衡山致仕

特召金閨籍頻章碧海私乞歸寧待老晦迹已嫌遲越
竹成遊轡吳蠶吐釣絲百年行樂地千里故人思

滄峽道中

崎嶇滄峽道度嶺復緣溪新草迷殘徑奔泉嚙故堤叢
林千壑暗絕頂萬山低策馬無停息倉皇日已西

偶出

偶出城東道天寒急暮潮亂帆爭入浦羸馬數驚橋地

金
卷九
鹵晴還濕江空風自饒秋高林日淡落木正蕭蕭

常山道中

驛路梅花發晴曛野色濃地經鄉國盡春送客愁重鳥
出雲中樹山青雨後峯徘徊停蓋久絕壁倚孤松

堯廟

堯山開古廟登眺及新晴分草窮泉出攀藤靜鳥驚松
風吹鬢亂岩日照衣明興劇歸來晚村烟入望橫

呂梁會張玉湖次韻

數年不相見相見忽如新今古多長嘯江湖幾故人清
詩能自適濁酒且相親莫惜尊前醉斜陽映別津

登分宜縣鈐山

鈐山聞絕勝萬木碧峯高寺入千迴徑城周百轉濠聞
鐘如入定見市不驚囂極眺生遐思登臨未覺勞

索州道中

萬山忽平地十里見高城雲黑農占雨山青客候晴樓
臺烟外景雞犬市中聲日午方酣暑霜臺駐旆旌

宣風早發

出門天未曉霧氣滿山川
露濕涼侵體風微暑避軒
日從雲罅閃泉到石稜
濺促騎吾知倦前村爨未烟

過鄱陽湖時旱久湖淺漁人結茅沙上

雨水春來少湖中露淺沙
張帆非舊渡牽纜有迂涯
宿草魚龍窟新茅雞犬家
夜行殊不險蕭鼓月中譁

灕江二首

灕水誰云險逢春景亦妍
看山朝倚櫂待月夜開船
灕

急長郵近橋懸斷壑連捲簾一尊酒獨酌思悠然
連山勢不絕萬木挿天青兩岸深猿窟孤墩舊哨亭巖
高午見日林密夜迷星人靜來猿嘯悽悽不可聽

自適二首

年來尋自適不覺任情偏生意栽花活忘機乳燕翩眼
寬巖上立心放醉餘眠何必離塵俗時平即葛天
曉事翻多事人心本自虛驚衰因對鏡泥古為知書不
盡盈無忌多忘悶自除從前殊費力吾愛舊迂疎

議禮下獄

事主勿欺曾學古保身明哲昧于今雲環九闕青天近
路入重圍白日陰宗廟難忘先帝德簡書不負小臣心
銀鐙在繫終何怨城上烏啼幾正襟

獄中次李舉之韻

官非司諫終難嘿事係倫常敢顧身聖怒不妨為孝子
狂言豈敢託忠臣古槐蔭滿常羈日鵬鳥晴飛不畏人
咫尺忽傳雷雨至餘威還攝怒龍鱗

謁卧龍岡武侯廟

古柏森森落日蒼
祠堂高枕卧龍岡
大名早定山川重
正議終垂伏臘長
三顧義同莘出處
兩朝身係漢興亡
我來再拜瞻遺像
麟閣雲臺盡渺茫

見邸報有感

鳳樓玉帶掛金魚
意氣飛揚稷契如
燠閣密宣常獨對
冰銜超拜盡親除
豈無同黨傾安石
未有宣言奪范雎
此日放歸真不測
都門送客幾迴車

同御史李中溪遊仙巖寺寺在鬼谷岩絕頂

遙向清溪問碧空
縣崖高閣白雲中
共愁仙壑何能到
偶逐僧叢有路通
漸覺鬚眉沾霧氣
忽驚人語落天風
塵襟此日消幾盡
況有高談達者同

柯山在衢州府城南三十餘里即仙人奕棋樵夫爛柯之地

曉披晴霧上層巒
百丈危梯一岸冠
影暗藤蘿雲出洞
字封苔蘚石生瘢
山田雨足秋仍熟
石室風高夏亦寒

棋罷仙童復何處
冷烟殘靄鎖巔岵

安慶兄入覲次少石韻

出郭晨迎五馬旌
公朝先得慰私情
寒牀薊北頻宵夢
春草江南隔歲程
尚有塵埃沾鬢髮
且將肥瘦問燈檠
天倫樂事人間少
故國相期接轡行

挽羅峯

抵掌朝堂百不如
銜恩日日拜新除
明綸在握身難繫
狡窟徒營事總虛
客散不聞籬犬吠
骨寒猶有史孤書

只憐舊頌青苗輩便附人言有歎歔

長鬣東甌一豎儒片言誤主擅黃樞氣凌七貴猶餘鰲
頤使千官盡若鴛此後正人方貼席從前同黨幾張弧
笑君十載為公相不得徐生一束芻

東湖

湖日初晴爛曉霞竹輿披露度芳華短苗斜引溪前水
小荻新穿雨後沙馬踏落花過藥圃鶯啼脩竹到僧家
閒來不覺塵心淨坐聽鳴橈弄水涯

丁酉元日

滿城鐘鼓雜雞聲
星斗闌珊天欲明
萬事初新從此日
百年將半覺多情
雪消春水河流急
樹暖朝暄萼蕊生
處處土風欣改歲
各將羅綺炫昇平

賦得家居之樂

曉晴湖日上層樓
睡起梳頭對野鷗
詩社筒來催夙約
山家酒熟喚春遊
輕便度嶺雙肩轎
小巧穿橋獨櫓舟
日暮恐迷歸去路
短松脩竹認芳洲

天童寺

溪轉峯迴翠靄新
諸天樓閣傍星辰
深山笋熟人如市
梵戶茶香客自頻
龕燭能留長夜月
天花不斷四時春
共來物外舒塵縛
莫厭披襟與岸巾

北固待午坡不至

柳色春深映驛樓
好風江畔促行舟
沙頭水急潮初落
山腹烟多雨未收
高閣斷鴻欹枕倦
遠村孤笛捲簾愁
相期一醉金山寺
斜日中流亂白鷗

悼石樓兄

朔風吹雨雁驚鳴寂莫胡牀舊感并老去瞻依兄似父
夢回形影死猶生菊迷芳徑秋方慘鶴度千山月自明
惟有勲名垂不朽簡書含泪續鄉評

翠微花夢且相依轉眼鷁原怨落暉千里風塵常遠別
百年鴻鴈幾同飛仙家歲月清宵短鄉國衣冠白髮稀
誰向河東問三鳳鷁行思舊濕朝衣

獨坐

獨坐公庭盡日幽
晚風殘日對林丘
乾坤多事誰能靜
草樹無情我共休
黃鳥聲稀春事去
青山道在幾人游
閒來不盡尊罍興
賴有琴書慰客愁

舟中述懷

經年持節又趨朝
楚雨閩嵐萬里遙
畫虎自慙為拙宦
聞雞獨起在清宵
近河山好簾常捲
午夜詩成燭半消
風景蒼茫春事去
柴門花落草齊腰

途中漫述

曉晴紅日照樓臺睡起臨風望眼開
野樹巢空驚鶴去淺灘船動覺潮來
幾年湖海王程倦萬里雲霄客夢迴
風景滿前誰共語碧山紅葉自銜杯

舒憤與中溪敘別

宦游何處濯冠纓九曲溪頭溪水清
開口好談天下事反躬常愧古人情
讀書直為乾坤計按劍須令虎豹驚
今日與君相別後再添鷗鳥結新盟

不隨兒女共悲呻直是胷中見道真
萬馬奔時先駐足

亂鋒攢處獨當身敢云骭髀能成事使識江湖尚有人
此意曾藏幾十載逢君不覺倍精神

龜峯有寺甚佳寺僧多逃景象落莫遊之悵然
亂峯叢起暗僧堂朶朶芙蓉競曉粧絕壁有松人不到
深林無主鳥相忘老僧避客嫌山好高士題詩任草荒
獨自往來看不厭好懷元不為人忙

偕李月山趙南厓游羅浮山

春日晴峯插海濤躋攀千里共忘勞水源將盡桃花落

雲氣常隨鶴影高
白髮避秦何處覓
赤松辭漢幾人豪
塵懷且盡今宵樂
草坐流連醉濁醪

讀陳白沙集

人世紛華百計辭
白沙門徑有誰知
乾坤不可無高眼
風月從來屬盛時
獨許巢由能見道
自矜李杜不同詩
平生遺草無多字
三百篇來僅有斯

自祝融峯歸至南臺寺少憩

南臺禪閣傍山隈
萬木陰森石徑迴
十里已從雲外上

千山初向望中開
松房鐘靜無人到
石鼎茶香有鶴來
我欲留詩詩不就
彌明原是此中才

再和宣明館陽明先生韻

五色晴江雨後痕
亂峯雲氣月華渾
邊陲萬里還通驛
盛世深山亦有村
興至欲穿雙屐去
愁來只對一燈昏
夜郎詩思知多少
恐有當年遷客魂

贈南溪方伯致仕旋里

投老思霑下建章
黃冠已改舊時裝
塵埃無復侵蓬鬢

歲月從今屬草堂
遂見雲中歸白鶴
便從烟末聽滄浪
故園莫放梅花發
留待先生進一觴

歸田再疏拂征衣
白首何人解息機
烟草盡知催客去
松鳧已解傍船飛
囊歸閩海添書卷
家近桐江有釣磯
故里諸公翹首待
扳轅猶恐滯東歸

羅源分司次壁間雙江險韻

官轍相拘困網羅
驅馳疲骨欲成瘡
邑迎人吏喧鄉馭
野供行廚薦海螺
狂咏正逢情放處
看山其奈興闌何

敢言揚激消公事滿眼侵人荊棘多

送李明府還鎮南

長江浪急野鷗閒世事惟應賦考槃
萬里碧雞雲外路
三秋青雀月中灘
身輕最喜還家早
道在何愁去國難
回首故人遙共憶
碧梧岡上拂塵冠

惜別

渡頭微靄閣斜陽
江上離愁夜未央
一別動經千里濶
百年消得幾回忙
相思華髮俱同輩
何處青山似故鄉

此夜只聞蘆荻滿蕭蕭風雨助更長

裕州道中避雨大成寺

野寺停驂晚更幽小堂清坐對林丘
好山借雨方能到萬念逢僧覺暫休
亂石甃垣青草細蒼藤纏洞白雲流
客情日日黃埃裏剩得今宵人外遊

武當山

高天絳節往來通海上三山未許同
地軸半空縣北斗山根千里接中嵩
峯頭蠟照黃金屋爐內香浮白玉宮

神道自來堪設教萬年此地祝年豐

浙川道

羣峯繚繞忽平原江上孤城百雉懸
嶺積重重斜取路溪流曲曲暗通泉
楚秦勢角三分地雨雪寒爭二月天
最喜山民生計活旋添茅屋不須錢

清明

清明日薄晝陰陰籬外新秧短似針
縛草象人田畔立借他風力逐飛禽



甬上耆舊詩卷九

欽定四庫全書

甬上耆舊詩卷十

監察御史胡文學編

行太僕卿陳石亭先生沂

字魯南先世徵入太醫院遂居南京先生體短
疎眉目風神朗秀五歲能屬對八歲能摹古人
畫十歲能詩十二歲作孔墨解赤寶山賦傳誦
人口名瞻然起時野亭劉公白巖喬公柴墟儲

公俱海內碩望相繼來官留都並引先生為忘
年交及中進士改庶吉士年已四十有八為夙
名士矣授編修進侍講所撰進講章善寓諷諫
上心識其名以見忤永嘉出為江西叅議多惠
政遷山東叅政值歲災後先生身行部發官帑
市牛給民墾藝且寬其租歲既熟又為捐除種
馬薪木運部諸徭民得甦息入賀遇永嘉長安
道上勞之曰先生久外行召矣先生曰齊民困

甚能行吾疏殊勝吾受德也永嘉意拂然遂改
為山西行太僕卿力請老歸里先生性篤孝友
事二親死生情文備極人所難及素廉于財營
弟妹婚嫁貸以備禮聞鄉閭有緩急匍匐救之
惟恐後至甬上人客留都先生盡與款接情若
比隣不稍分疎近晚年築遂初齋于家園杜門
撰述絕意世事所著詩文拘虛集總修金陵志
南畿總志山東通志自撰翰林志金陵世紀蓄

德錄誨似錄花巖志游名山錄晤言詩談諸書

南巡舊京歌

橫戈八駿戰功收夾舸雙龍水面游
紫蓋風雲過沛上錦帆煙月下揚州

迎鑾驛下萬艘齊白浪排空赤岸低
總謂北來天塹隔豫章城只在江西

六龍神運起江淮五馬歌聲再渡來
千古金陵王氣盛彤雲曾繞鳳凰臺

山櫻江藕薦時鮮
況有嘉魚出錦淵
聖體從誰問行在
朝廷北極是幽燕

宮詞

瓊島春泉下玉溝
年年歲歲御泉流
無端夜雨生新漲
流出宮牆是外頭

後庭仙樹是誰栽
春盡重門鎖綠苔
聞說翠華籠燭過
上陽宮裏看花來

少年行

君不見昔日高陽之酒徒解貂市上親行酤自笑奮力
非耕鉏盡日博塞為擣蒲袒跣上踞聲豪麤得意應手
皆成盧劉毅家儲甌石無擲取百萬時須臾千金散盡
輕泥塗五侯七貴猶雞雞唾視不足當昆吾婦女見辱
國邑屠僭據上位身稱孤前途一敗面縛俘還如六博
勢向輸米雋不來徒爾呼吁嗟乎翻轅覆轍非險塗安
得恃勝為長驅

江上二首

江水日東逝飄風自東來水性惟欲下揚波復牽回人
事有順逆欲發還徘徊飄風曾幾時息櫂且銜杯
息櫂復息櫂櫂息歌亦稀歌中有何益但訴志多違流
水宜東去從風合西歸出門豈無定中道復誰依

除歲書懷

車前斷深壑舟際陷重冰駕驂不容止迴舵猶未能清
漏此年盡初旭明歲升無歡厭栢醕顧影怨蘭燈閨中
卜云近燈花指為徵

顧氏園

佳麗樓西羅市前王臺謝館地相連朱雀門通朱雀艦
鳳凰山帶鳳凰泉建業豪華古稱絕十二宮城開綺陌
祭戟高門卿相家山池曲榭神仙宅六朝家世舊風流
猶說當年顧虎頭竹密花深如樂苑窗盈池繞似滄洲
東晉香爐金籀字南唐畫障澄心紙米家圖畫鄴侯
書平泉樹石烏皮几逍遙日涉自成趣棧館煙庭非
一處古來不數辟疆園肯使王猷肆然去阿戎來候

小肩輿步屨花間入
隱居坐久不知山色暝
仰看松
月夜窗虛

對月贈劉按察元瑞入滇南

憶昨看月與君同
月在蕭臺煙樹東
桐花香吐石壇冷
松枝影落溪堂空
可憐今夜高城隔
况復蟾光漸生魄
照我思君欲斷腸
照君向我天涯別
天涯雲霧何茫茫
千山萬山途路長
從知馬上看圓缺
相逐君行漸異鄉

重別行送李川甫

帝城門外揚車塵盡日勞勞行路人人生離別重
繾綣況復送君當暮春昨日花開復欲落黑髮幾時不
為樂我今向衰君少年我少年時亦如昨燕臺黃金
照日邊古人已往今誰賢世事多悲更難語繫馬躊
躇尊酒前

宮柳

嫋嫋春聲裏陰陰曉色中縷垂金屋暗花散玉樓空凝

露啼秦苑因風闕楚宮不知行輦處幾樹近簾櫳

華蓋殿入候

侍從趨中禁天闕夜暫開星辰宿飛棟風露下層臺設
炬人初動傳香駕欲來聯行肅裳佩未敢更徘徊

內苑涵碧亭

苑入黃金塢橋迴碧樹灣龍池觀九島鼇禁覓三山溜
轉雲車急花深月殿閒從來人罕至御榻在中間

還宮

寶騎出長楊
輿人入建章
池烟香合暝
宮燭月籠光
鼓角春城閉
樓臺夜曲揚
從茲罷巡幸
四海奉時康

聞討宸濠有作

吳淞窺覲久
南方竟失寧
帝心宣四國
天討慰諸靈
多難何煩見
流言不忍聽
可憐親睦禮
哀痛出彤庭

觀音山江閣與顧英玉中秋看月

鷺嶺宿龍宮
凭闌一望中
天遙滄海盡
月小大江空
亂石穿寒溜
虛廊度晚風
只疑雲漢渚
偶爾客槎通

與華玉登金山

江心擁鷺峯金界出芙蓉僧向空中定人從水上逢縣
燈動星月傳梵起魚龍浪說蓬瀛路鯨波更幾重

再經岱嶽下

岱嶽橫中野危梯歷太勞望時初不異登處始知高天
地形何大風雲意自豪雖云容土壤安得補秋毫

上城北望

關鑰雄三險王畿實在燕黃塵回躍馬青海絕飛鳶劍

閣何曾恃金城不可捐輪臺如有詔此意答皇天

漫興

獻璞當年出今懷白玉歸尚餘松檜楫未老芟荷衣林
靜鳥無語山閒雲不飛此中空寂久那復問禪機

山中喜雪

飛雪仍殘臘風光改歲華入丘迷鶴埵向水淨鷗沙凍
柳先飄絮枯梨早著花地爐煨濁酒應讓野人家

過吉水永泰寺

亂峯迴絕澗荒殿掩空扉當路草盈尺遶垣松數圍定
僧離世久驚犬見人稀午坐同齋供山厨煮蕨薇

山寺漫興

出郭少人事更居林壑間僕因隨主懶僧反愛吾閒碧
草生滿地白雲常在山城中會相問未卜幾時還

正旦即事

帝輦時巡久未回天門遙拜重徘徊封箋自向慈宮進
方貢還同異國來春轉青旗開羽仗日臨金榜上樓臺

帷城尚在燕山外誰獻正元萬壽杯

憶昔

清宵爇火帶星光天祿曾為著作郎門下候朝深坐館
殿前迴院曲通廊羣公次第多含笑滿袖氤氲尚有香
黃屋朱扉照初日中官兩兩玉闌傍

紫宸朝退下青扉侍從花間過錦衣金吐鳳皇香不散
玉傾鸚鵡醉方歸楹高甲帳雲霞色官冷腰牌冰雪輝
一自夢回天萬里長安空見塞鴻歸

兩朝稽古備詞臣上逼仙班壓縉紳避路火城傳衛士
具餐晨館候庖人春深玉署翻紅藥日晚金河出素鱗
莫為涼颺惜團扇向來共奉受恩頻

江上呈華玉

龍江東下水疑空飛鳥流雲落鏡中千里晴光遙漾日
滿船秋色澹無風青山舊國知何處芳草離情去未窮
晚折蘋花思對酒燈前還有故人同

夏日雜興

下俯江流百丈深上臨山殿樹陰陰中原正朔回天地
聖祖高文照古今過雨輕雲虹未斷浴波餘彩日初沈
樽前散髮踈狂甚轉席移觴風滿襟

野寺清涼舊有名空廊還傍石頭城侵階竹蔭差差轉
入座荷香細細生西府山前車輦路南唐宮裏轆轤聲
冰漿玉碗傳瓜處想像君臣萬古情

楊柳微風岸口生青溪泛舸月中行空驚宿鷺迎橈起
却放流螢入幔明大計劉琨惟坐嘯偏安王導亦垂名

當年燕樂陳魚藻豐鎬由來是帝京

水邊樓榭晚風和香送陂塘十里荷隔浦船回紅艷淨
滿山蟬響綠陰多居人不省前朝事溪女猶為子夜歌
飛鷺浴鳬俱自適老翁相對意如何

宸濠廢宮

章水故宮何處是幾株衰柳亦從遮金書葬地無劉渚
玉樹歌聲有麗華秋日放鷹芳草陌春風飛燕野人家
諸公臺省多休暇每憶當時一嘆嗟

匡廬瀑布泉

瀑水來天上，奔流入大荒。
氤氲元氣合，澎湃海波長。
暝落明河影，晴交白日光。
星源窮有穴，崙嶺倏移方。
潤谷千林濕，空音九夏涼。
五峯喧漱石，三峽動飛梁。
入澗懸猿絕，穿雲度鳥妨。
玉垂風不斷，珠散雨俱揚。
逖引禪心吸，甘分客味嘗。
無因修淨社，終日坐相忘。

春草

夜雨江南夢，春風陌上情。
東皇如有意，移向玉階生。

青溪橋二首

遙山亂雲樹流水淨溪沙日暮行人絕危橋一徑斜
浮雲亂出山落日鳥飛盡獨立向溪橋寒流照容鬢

大駕西狩還京百官出候于德勝門

遙聞振旅入居庸八駿歸來御六龍莫道榆關消息近
沙河一水更千重

直望氤氲紫氣遙萬重飛控馬蕭蕭鴛班虎隊皆戎服
兩度迎鑾德勝橋

天皇自納簡書回神武將軍可汗才仙仗不煩陳輦路
籠街喝道數聲來

錦標金胄照戎衣挾羽橫戈自將歸萬騎羣中天馬出
一時傳到疾如飛

放內苑諸禽

多年調養在雕籠放出初飛失舊叢祇為恩深未能去
朝來還繞上陽宮

宜人馬氏

附

名閒卿字芷居金陵人先生之繼室也先生喪耦
知其賢而有文遂委禽焉年八十尚不廢咏吟書
法蘇長公得其筆意頗與先生相類善山水白描
畫畢手裂之不以示人扁其室曰芷居詩名芷居
集

苦雨

終日雨翻盆愁人欲斷魂
嶺雲生屋角埜水沒籬根
楊柳深藏徑梨花靜掩門
聲聲偏入耳寂莫自黃昏

暮秋

野色滿園中閒情立晚風菊花含雨艷楓葉醉霜紅

有感

春風冷落後秋圃恨開遲總是宜男草傍人也未知

暮春

紗牕睡起靄朝暉滿院鶯聲花正飛閒裏不知因甚事

春來容易送春歸

七夕

靈鵲成橋事有無人間今夜憶黃姑倚窓坐久秋聲
動一葉西風到碧梧

按察副使陳后岡先生柬

字約之為兒時已奇慧絕倫日誦數千言試之對
輒應聲就數又奇中諸公大奇之稍長出從里中
師所講授經義先生率卧勿聽乃益汜濫百家上
下屈宋班馬之間所為古文詞頗自引重視同輩
俱妮妮不足伍既中進士入翰林與唐應德王道

思諸人益刻厲為古學性亢潔不喜逢世張桂受
上殊寵朝士盡奔走顧獨慕先生名欲相款引終
不一折節歲時上壽遣吏投刺馳馬過其門諸老
恨之入骨呼為輕薄小黃毛同輩亦多姍螫者乃
出為湖廣按察僉事置蠻劇之地以重困之彼意
先生徒能負氣持虛言彈射必不肯自抑精會計
聽斷修舉吏事逮其敗當即擯之而先生獨能勵
志益舉其職終無詞罷免稍遷視學河南既歷劬

瘁常鬱悶無聊再疏求去不得竟縱酒屬疾嘔血
數升而死年纔三十有三道思適同藩入枕其股
而哭之與吾鄉周大卿共經紀其喪應德不遠千
里哭之越中為刻遺集行世

銅雀妓

銅羽遡秋風金樓夜帳空舞鸞君詎見調鳳妾猶工淚
竹愁難滅采菱歌已窮翻憐秦帝寵驪下許相同

高陽行二首

高陽年少事橫行重俠由來不重生奪得寶刀搖雪色
騎將飛馬蹴風聲

北風吹隴簸黃沙縱博千場日未斜白劍殺人丹劍舞
笑歌踏入酒姬家

夕霽對月有懷唐一編修

終日滯飛濛三徑絕來往檐溜一以捐族雪漸迴蕩長
飈纈河出月華依波上微微辨林柯稍稍晰塵鞅槿委
猶餘泣萱開更映幌草螢掠明流土蟲疑晝響命酒陶

清虛解襟納新爽懷人邈不御樂來何由賞沈思永終
夕景同神宜往

過徐李二子再游東林寺

入林禮名禪山深變炎夏清飈激層檐流水注戶下孤
磬遠烟微長廊飯僧罷暫結塵外踪稍懷遠公駕虎去
識餘溪蓮開見遺社四禪邈難依百齡竟安假冥心合
委和曠覽齊物化踈達任吾生塵緣兩相謝

望湖亭遲唐子

策策下危磴風前立小亭獨游坐超越屬思臨深冥野
色向人盡一湖含暉明雲開知日處其上峯遙輕目送
鳥漸遠嘹然遺我聲相感適無謂于焉觀物情坐念所
期子影影塵中行

二三同志夜酌碧雲寺分韻

曠途踈俗寰靜域臨飛嶠形苞隱淪勝勢抗清虛表鷺
嶺互盤旋龍泉吐涓渺雪竇迴暑清雲構翳空小分池
物法鱗作埒抽金草覺花明冬春香蘿掛昏曉微尚在

幽寂乘休恣探討
筏海滯塵緣游山訪
真了指景晤已
深延賞悰非少適
感伯倫情兼希魯陽
妙流觴酌駛湍
揮手招顏顥任達
本所經燕樂苦不早
直耽真聖理勿
為俗賢道

嶮峽舟中遇江子順提學考績北上贈別因成
長句

故人相逢清溪口
斷岸維舟一尊酒
醉愁折柳背河關
笑看垂楊生左肘
青山沈沈秋日光
颯然海氣飄微涼

忽憶曾為東觀史此時君作尚書郎昨日蛇年走賢士
別來意氣期如此三載不見鬚眉存還是豫章一男子
落水一去時不還我今踰躅來山藩寸心指著向知己
片時會對成分翻近日徵賢徧都邑東巡西祀羣賢集
宰相閣東禮通儒將軍門下容長揖世塗參錯詎可料
英雄況復非常調喘息余憐軀下駒文蔚爾為將變豹
握蘭在身身自知投璧向人人不譽別去相思一調笑
知爾甘泉不上書

過武溪楊隱君草堂

清溪幽隱處，白首性情閒。
鶴起開松徑，風歸閉竹關。
道書堆几上，耕耒挂牀間。
坐悟忘言理，令人不解還。

石灘

石劣不受鑿，水歸時礙行。
却令無競性，翻作不平鳴。
逆折聲猶壯，崩騰色自明。
我行殊昧險，于此獨嬰情。

過吳維隱居

委巷疎塵宇，空齋問隱淪。
應門兩童子，拄杖一閒身。
下

馬見深意焚魚知久貧相省祇有笑握手更何陳

漳水別唐一太史之洛

漳河流不極離思渺難裁可堪今夜月復照別時杯路
向銅駝去人傳金馬來南征能作賦遲爾二班才

春江夜泛

日昏貪利涉繫榜自相鳴水動春星亂山潛野火明幽
虛機盡息澹泊道初成豈有形容在猶然問姓名

與田提學行清化道中

授服驚窮節離居感客情霜清沙鴈至露白草蟲鳴到
谷看天籟隨山採地精幽尋祇得性游宦不期名

公安得唐應德村居詩酬贈

應是歸休日安貧得所如鹿裘新著便貝帶舊遊疎返
舍因爭席還山羨卜廬閉關無遠意不著絕交書

偃息荆溪上明時挂一瓢帶經收雨麥抱甕汲春苗石
室寧期道茅齋已混樵時聞田社客伏臘每相邀

春日渡漢陽

春風淡微雨了了見前川背水千家閉連山百雉縣鶯啼江上樹人散渡頭烟此日乘流者羈思殊未捐

春晚郊行

遲日出郊圻悠然塵事稀野陰堪結蓋溝水欲流衣俠客探丸返佳人抱瑟歸喧喧四隣夕徙倚向斜暉

禁中對雪

禁裏霏霏朔氣饒縈風飄度薊門遙初翻金馬疑飛絮漸集銅龍似薄綃百子銀題全合色萬年花發半封條

縣聞睿詔賡黃竹佇待東曹染赤毫

臨淄舟次東唐一太史

客中相見倍情親日日追歡意未申
近水割鱗時供酒遠山啼鳥盡關人
踈慵且喜隨中散鄙薄那堪作外臣
愁計別程能幾日未須岐路已沾巾

病後還朝毘陵唐編修兄弟攜舟相送醉中話

舊因懷任二考功次韻作

時唐方應命起廢

舟迎浦樹綠參參笑傲逢君僻性耽陸氏弟兄原莫逆

龐家主客自來諳病中握手愁能奈廢後還朝志豈堪
惟有同袍應問訊定言幾日發山南

贈汪御史山居

小山卜築背孤城大隱青春早謝名門長綠蘿時挂塵
溪分流水幾投纓霜前鳥去收遺果雨後鷗肥拾野羹
寂歷小亭無一事時從羽客話長生

秋日分祀孔子廟

屬聖重儒宗當秋秩祀隆文明涓上日祈翼攝玄工松

柏開新廟笙琴似舊宮居非一畝儉莫即兩楹中玉簋
馨明德金聲辨素功從公百辟戾陟配四科同有血神
如在無言教已通升堂獨何幸俎豆挹前風

送唐子朝長陵

周王東定日虞后北巡年虎旅陰山轉龍舟夜壑還珠
丘開白瑤琳殿閔玄泉示儉裁流水崇威迴跨邊雲中
分地脉斗極應星躔弓墮天難陟冠遊月尚還光靈六
聖扈警蹕八神傳南至恭明祀東曹簡上賢瞻依徒欲

金史四庫全書
卷十
贈悽惻未能宣

咏神樂觀梅花

素質舒元圃清芬裊碧紗
自將幽獨意不逐艷陽華
避暖遲開葉凌寒早著花瓣輕飄易墜枝曲影從斜
襟雪明春砌隨風入暮笳
何須飛寶曆長此奉仙家

入閩

海國深秋別山關入望窮
人家青壁裏鳥道綠蘿中
地暖收蒟葉天寒折桂叢
嵐蒸晴亦雨瀑落靜還風
靈藥

繡經識訛言待譯通問耕留野老賦食與山童直是忘
機甚非將大隱同

上已

五都皆襍渭百戲盡臨渠自憐妨太潔不事更修除

夜泊羊原

萬曲寒流滙碧灣千家烟雨閉柴關來愁烏帽生人悶
到喜青山對客閒

恭人董氏

附

山陰人侍郎董中峯先生女也生甚慧待年于家中峯嘗曰吾女非得奇男子勿字徧視里中兒無可者偶與吾鄉張文定公同游禹穴間從容具言尚壻事張公曰吾里有陳生家雖微其人才足壻也中峯乃與其夫人特來甬上試召陳生垂髻敝衣膚神玉映叩之無不響答試以詩文揮筆如雲烟中峯大喜即命日為婚相伉儷甚篤然中峯固知其夫婦良不永年及后岡沒未幾恭人亦卒

泊淮代外答唐太史

十年生事半同君，萬里傷心逐楚雲。
遠浦維舟潮欲上，平林對酒月初分。
逢人牛馬時堪應，到處鳬鷗漸作羣。
共是機情忘已盡，欲將通塞任斯文。

甬上耆舊詩卷十